

# Khris' Suangphum

Suangphum lepkhitsa loungal suangphum dang kuamah in a lem theita kei, huai suangphum Jesu Khrist ahi - 1 Kor. 3:11

Vol. XVII. No. 20

Private circulation

June 2, 2019

Paul hinkhua apan...

## THEIHNA A POIMOH DAN

Sutzopna...

- Jamson -

Paul theihna koi a hong kipan hi diing hiam?  
Jesu khris apan

Paul in Galatia a Saptuamte kiang ah Sawltak ahihna hiai bang in ana gen hi, **“Jesu Khrist leh misi lak a kipan a kaithoupa, Pa Pathian ziak a sawltak, mihing sawlkhiaq hilou, mihing vang a leng hi samlou”** (Galatiate 1:1), **“Huchi in ka tanchin hoih genpen mihing lamthu ahikei chih kon theisak hi. Mihing kiang a kipan a ka muh leng ahikei, mi hon hilh leng ka hi samkei, Jesu Khrist kilakna ziak a mu ka hizaw hi”** (Galatiate 1:11-12). Paul in a theihna pen mihing apan hilou a Jesu Khrist apan ahihdan ana gumtinten hi.

Jesu Khris in kimaituah a asapkhit in Paul Jerusalem a sawltakte kiang a instruction la diing in a hohkei a, Arabia gam ah apaizaw hi (Gal.1:16-18). Sawltak dangte mahbang in Paul in leng a nasep a patma in Jesu toh kum thum lam mahmah sinkhawm in Jesu apan mahmah in Tanchin hoih ana zil hi (Gal. 1:12).

Paul in Galatiate kiang a ataklat nop pipen khat bel Aman leng sawltak dangte bang a Jesu khris apan mahmah a tangtak a Tanchin hoih ana zil ahi chih ahi.

A pianthak zoh kum 14 vel in Jerusalem ah ava hoh a huai ah saptuam upate khenkhat toh ava kimu ua, huan, sawltak Peter leh Johan toh leng ava kimu (Galatiate 2:10). Hiai hun ah Paul in Antiok leh mun dangdang a ana thugensate leh Jerusalem, Judia leh Samari a sawltak dangte'n ana thugen uh a kibang vek hi. Hiai apan in leng Paul in sawltak dangte bang a Jesu Khris mahmah apan ana zil ahihdan a kilang nawn hi.

### Gamaliel apan

Tuabang kallak ah Juda tampite'n a sawltak hihna ana ginlelh sak ziak un Philipi laikhak ah hiai toh kisai Paul in ana genchian hi. **“... Mi himhim in sapum a suanding nei a a kitheh leh ken ka neisem hi”** (Phil 3:4). **“A ni giantni a zeksum, Israel chi, Benjamin nam, Hebru mi kholdiak, dan lam a Pharisai; phatuam ngaihna lam chilehang Saptuamte sawi; dan a diktatna lam chilehang gensiatbei ka hi”** (Phil. 3:4-6).

Juda dan theilel hilou in Paul tuh huai hunlai a sinsaktu thupipenpen Gamaliel khebul a ana khanglian ahi. Juda sinsaktu siampen leh thupipen nuai a khangkhia ahih toh kiton in a pilna leh siamna tungtuang mahmah ahihdan Athen khua a philosopher minthang tampite thugen a bangmahlou a suahna ah amuhtheih hi (Nas. 17:22-33). Himahleh Paul in hiaite tuh ningneng bang phet ahi a chi (Phil. 3:7-8).

### A theihna thupitak ziak a Paul hamphatnate -

1. Amah ah kimuan ngamna leh hansana a pia - Sanhedrin a siampu lian Anania mai a adinna (Nas 23:1-11). Athen

a Areopaga a philosopher-te kiang a athugendan. Na theihlouh uh ken hon hilh diing ka hi chin kimuangtak in thutak a gen (Nas. 17:22-33). Felix ma ah (Nas. 24:1-27), Festa ma ah (Nas. 25:1-12).

2. Ginglou mite a seldong. Damaska khua a Judate a seldong hithet (Nas. 9:20). Saptuam a pitute leng huai bang diing mah ahi uh – thutak kalh a sinsakna diklou sinsakte siamlouh atansak diing uh (Tita 1:9).

3. Khris apan theihna hohtak a neih ziak in **“zawndan ka siam, hauhdan leng ka siam; thil chih leh koimun teng a gilvah leh gilkiak a om theihna; niang leh tasam a om theihna thuguk ka theikheta hi. Amah kei hon hihatpa ah thiltengteng ka hih thei hi”** a chi thei (Philipite 4:12-13).

4. A neupen apan a lianpen (Kaisar kiang tanpha ah) tan kiang ah Tanchin hoih ana tunzou hi.

5. Sinsakna diklou ziak a pawlkaihna omthei diingte ana mekmitvek (Korin ah, Galatia ah). Amah damsung a thutuam genna ziak a pialmangna thupi omlou, amah painung a hong ompan (Nasepte 20:20f).

### Thukhitna -

Mihing pilna apan hilou a Paul mahbang a eite'n leng Jesu Khris apat mahmah a zil a theihna I neih uh poimoh hi. Huai in koipeuh a om saptuamte thugen ah hon kipumkhat sak diing hi. Paul in Jesu apan zillou a, amah theihdan leh muhdan thu gen hileh sawltak dangte gen toh kituak theilou diing a, kipumkhatna omtheilou diing hi. Huchi bangmah in tuni'n eite'n leng Jesu gendan penmah theihlou a, Jesu sinsakna penmah I chihlouh chiang in ilak ah thugen a kipumkhatna omtheilou nak hi.

Huaiziak in Paul bang in Jesu mahmah apan zilni. Jesu apan mahmah in theih sawm ni. Jesu apan theihna tuh khristian tengteng a diing in a poimoh. Huan, Saptuam a pitute a diing in a apoimoh kholdiak hi.

**PLACE OF WORSHIP**

UCI Building,  
Sector - VI. RK Puram,  
New Delhi - 110022

Phone No. 9953968807

website : www.cocdelhi.org

'KHRIS' SUANGPHUM, A WEEKLY BULLETIN FOR  
THE MEMBERS OF THE CHURCH OF CHRIST, DELHI,  
ON THE FIRST DAY OF THE WEEK

Enkaitu : Jamson Guite

**BIBLE CLASS****Class**

Adult : Chinpau, Khenpi  
Junior : Timothy & Robert  
Primary : Ngaih lun, Biaknem & Minlun  
Beginner : Vungngaihkim & Biakkim

**Teacher****TOUPANI THILPIAK**

Date - 19.05.2019 - ₹ 26,053/-

**BIAKNA PROGRAM**

Toupani' (02/06/2019)

Hun-uk thumna : Timothy  
Lapi : Siamkhanmuan  
Thilpiak : Thangzalam  
Theihgigena : Kamkhenthang  
Thugen : Jamson  
Thumna : Lamsuanmung

**BIAKNA PROGRAM**

Kiginni (08/06/2019)

Hun-uk thumna: Pauminthang  
Lapi : Siamkhanmuan  
Thugen : Thanglian  
Thumna : Seilienmang  
Amun: UCI Building,  
Sector - 6, RK Puram

**BIAKNA PROGRAM**

Toupani' (09/06/2019)

Hun-uk thumna : Pauminthang  
Lapi : Siamkhanmuan  
Thilpiak : Thanglianmang  
Theihgigena : Thongginlian  
Thugen : L.James  
Thumna : Mungmuanlian

**THOUGHT OF THE WEEK**

**Mi thanuam khut in vai ahawm dia, himahleh mi thadah tuh ut leh utlou a nasemtu a pansak ahi diing hi (Paunakte 12:24).**

**THU TUAMTUAM****ZIN LEH TUNG**

✦ Kal paita sepnawnni in unaupa Chinpau-te innkuan in Berlin, Germany zuan in honna zinkhiaksanta uhi. Amau kum li vel huailam ah va omnawn phot diing uhi. Unaunu Lianem ahiehleh kha guk zoh chiang in hongkiknawn phot diing.

✦ Unaunu Brenda leh unaunu Judith Kimlianmawi-te'n leng nipi hun awl zang diing in kal paita Toupani in Imphal lam zuan in honna zinkhiaksan uhi. Sawtkhop va om diing uh hituak hi.

✦ Huchi mahbang in unaupa Nangmuanlal leh unaupa Reuben in leng kal paita sung mah in nipi hun awl mang diing in Delhi nusia in Manipur lam ah honna zinkhiaksan uhi.

✦ Unaupa James-te innkuan in leng New Lamka a 'Night Fellowship' zang diing leh nipi hun awl mangkawm diing in kal paita ningani in Lamka lam ah honna zinkhiaksan nawn leuleu uhi. Sawt va omlou a June 15 vel a hongkiknawn pah diing uh hi in kigen uhi.

✦ Kal paita seppatni in unaupa GinSamuel in taksa a apianna nu cancer natna ziaak a damlou gim a om kep diing in Lamka lam ah honna zinkhiaksan hi. Anu hoihtak a ava etkol a dam a hongtunkik theihna diing in thumna ah phawk ni. Huan, anu a diing in leng thumpih ni hang.

✦ Unaunu Hauching leh unaunu Chingzachiin @Chiinpi-te'n leng zan kiginni in Lamka lam zuan in honna zinkhiaksan uhi.

✦ Tuma a Lamka lam a hih diing poimoh khenkhat ziaak a ana zin unaupa Kamkhenthang-te innkuan damtak in Delhi hongtung kiknawnta uhi.

**THU TUAMTUAM****HONG KISUAN KHESIANGTA UH**

✦ Unaupa Khamthianmung sepna Delhi a suan ahieh toh kiton in akhosakna uh Dehradun apan in a innkuan un kha khatvel paita in Delhi hongpai uhi. Zan in a inn van tengteng uh hongpawtung vekta ua, Sarita Vihar ah innluah in omta uhi.

✦ Unaunu Jamlunkim leng Lamka lam a hun sawtkuamtak ava om nung in a pasal toh Delhi hongpai nawnta hi. Tun Dwarka sectore-13 ah apasal toh innluah thak uhi.

**BUSINESS MEETING OM**

✦ Zan kiginni in gelkholh a omsa bangbang in unaupa Siamkhanmuan quarter muh ah Saptuam Business meeting poimohtak mai neih in om nawn hi. Hiai hun ah unaute tamlua kipaikhawm theikei mahleh hunkhop paikhawm in thu poimoh tamtak kikupkhawm in om hi. Maban hun ah hiai bang a Saptuam hunte ngaipoimoh sem diing in kuapeuhmah i kichial thakthak ahi.

**DAMLOU**

✦ Kal paita sintawpni apan in unaupa Kammuanlal sung khoh in ana om hi. Tun ahiehleh Pathian panpihna toh hoihdeuhta hi. A hong dampah i deihsak uh.

✦ Miss Niangbiakkim d/o unaupa Joseph Pauminthang leng hiitang khosik ziaak in damlou in ana om. Pathian huhna toh ahoihlam hita hi.

✦ Master Ginlunmang s/o unaupa Thangbiaklun leng hiitang khosik ziaak mah in damlou in ana om hi. Amah leng a hoihlam hita.

**HUNZAT SIAM SAWM NI**

✦ I biakna mun pen midangte kikap a hunbi nei a zat ahiehman in ahunhun a pan thei diing in tunbaih sawm ni. Huan hunzangte leh siam sawn ni.

**CHURCH OF CHRIST, DELHI  
FINANCIAL REPORT,**

May - 2019

1. Opening bal.	1,06,660.00
2. Total Recv.	1,19,247.00
3. Grand Total	2,25,907.00
4. Total Expdt.	1,33,225.00
5. Closing Bal.	92,682.00